



Na Elder Allan F. Packer
No te Hitu Ahuru

Te buka

Ia riro te aamu utuafare e te ohipa hiero ei tuhaa tamau no ta tatou iho haamoriraa.

I to'u riroraa ei Scout e 12 matahiti te paari, ua farii au i te hoê tao'a hinaaro-rahi-hia no ta'u mauhaa scout. E hoê to'i iti ma te hoê tapo'i iri puua ! I te hoê tere haereraa avae i te mahana i muri mai, ua tae matou i te puhapaparaa i te pô, ua rari e ua to'eto'e no te rahi o te hiona na ni'a i te haere'a. Ua feruri oioui vau ia tahu i te hoê auahi rahi. Ua haamata ihora vau i te tapupu i te hoê tumu raau tei marua i raro ma te faaohipa i ta'u to'i iti. A tapupu ai au, ua inoio rii au no te mea aita e mutu maitai. Ua tamau â vau i te tapupu. Ma te mauruuru ore, ua ho'i atu vau i te vahi puhaparaa e maa tapu vahie noa. I raro a'e i te maramarama o te auahi a te tahi atu taata, ua ite ihora

vau i te fifi. Aita vau i tatarā i te tapo'i o te to'i. E nehenehe râ ta'u e parau, e ua hu'ahu'a roa te tapo'i iri puua i te tapupuhia. I to'u haapa'o-noa-raa i te tapupuraa, aita ia vau i haapa'o i te tahi atu mau mea faufaa rahi.

A haa ai tatou no te haere i te faateiteiraa, e ti'a ia tatou ia rave i te mau titauroa atoa e eiaha ia hahi ê atu na roto i te faatumuraa'tu i ni'a i te hoê aore râ e piti titauroa aore râ mau mea taa ê roa. E arata'i te imiraa i te basileia o te Atua i te oaoa e te poupou.¹ Mai te mea e titauhia, e ti'a ia tatou ia hinaaro ia *taui*. Mea iti a'e te mauui e te arepurepu o te mau faatitiaifaroraa ha'iha'i tamau i te mau faatitiaifaroraa rarahi.

Aita i maoro a'enei, ua tere atu te tuahine Packer e o vau nei i te mau fenua êê e rave rahi. Ua faaineine maua i ta maua buka ratere e te tahi atu mau parau. Ua farii maua i te mau patia atoa, te mau hi'opo'araa taote, te mau visa, e te mau titiro. I to maua taeraa i te mau fenua tata'itahi, ua hi'opo'ahia ta maua mau parau, e i te afaroraa te taato'araa o te mau titauroa, ua faati'ahia maua ia tomo atu.

Te titauroa i te faateiteiraa mai te faaineineraa ia no te tomo i roto i te tahi atu fenua ê. E ti'a ia tatou tata'itahi ia noaa ta tatou iho buka ratere pae varua. Eita na tatou e *haamau* te mau titauroa, e ti'a râ ia tatou tata'itahi ia haapa'o i te taato'araa o te mau titauroa. Tei roto i te opuaraa no te faaoraraa te taato'araa o te mau haapiiraa tumu, te mau ture, te mau faauerā, e te mau oro'a e titauhia ia tatou *paatoa* ia noaa te faateiteiraa.² Ei reira, « na roto i te Taraehara a [Iesu] Mesia, e ti'a ai i te taata atoa ia faaorahia ».³ E tauturu te Ekalesia eita râ e rave i te ohipa no tatou. E riro ia te titauroa i te faateiteiraa ei fâ ta tatou e tutava i te faatupu i te roaraa o to tatou oraraa.

Ua faanaho te Mesia i Ta'na Ekalesia no te tauturu ia tatou. Ua pii Oia 15 taata ta tatou e paturu ei mau peropheta, ei mau hi'o e ei mau heheu parau no te arata'i i te Ekalesia e no te haapii i te nunaa. Hoê â to te Peresideniraa Matamua⁴ e to te PÛpÛ no te Tino Ahuru ma Piti Aposetolo⁵ mana e mana faatere,⁶ e o te aposetolo matahiapo tei ma'itihia ei Peresideni no te Ekalesia. Ua piihia te mau Hitu Ahuru no te tauturu.⁷ E ere na te feia faatere e haamau i te mau titauroa no te faateiteiraa. Na te Atua ra ! Ua piihia teie feia faatere no te haapii, no te hohora, no te faaitoito e tae noa'tu no te *faaararaa* ia vai noa tatou i ni'a i te e'a.⁸

Mai tei tatarahia i roto i te buka arata'i : « No te faatupuraa i te opuaraa no te tauturu i te mau taata e te mau utuafare ia noaa te faateiteiraa, te faatumu nei te Ekalesia i ni'a i te mau hopoi'a tei haamauhia e te Atua. Oia ho'i, te tautururaa i te mau melo ia ora i te evanelia a Iesu Mesia, te haaputuputuraa ia Iseraela na roto



i te ohipa misionare, te utuuturaa i te mau taata rii e te veve, e te faati'araa i te faaoraraa o te feia pohe na roto i te paturaa i te mau hiero e te raveraa i te mau oro'a na roto i te monoraa ». ⁹ Mea titauhia teie na ohipa tumu e maha e te taato'araa o te tahi atu mau ture, te mau faauerua e te mau oro'a e aita e ti'a ia ma'iti. Na roto i te Taraehara a Iesu Mesia e te raveraa i teie mau mea atoa, te faarahi nei ia tatou i te mau titiro i ni'a i ta tatou buka ratere pae varua.

I roto i teie amuiraa, ua haapiihia tatou no ni'a i te mau tauraa o te tauturu ia tatou paatoa ia faaineine maitai a'e.

Ua riro te utuafare ei haapûraa no te opuaraa no te faaoraraa o te tumu paha i piihia'i te « rave'a rahi oaoa ». ¹⁰ Ua parau te peresideni Boyd K. Packer, « te ohipa rahi roa a'e i roto i te Ekalesia, o te faariroraa ia i te hoê tane e ta'na vahine e ta'na mau tamarii ei utuafare oaoa ». ¹¹

Ua parau te peresideni Spencer W. Kimball, « to tatou manu'araa, ei taata tata'itahi e ei Ekalesia, tei te huru ia o to tatou faatumu-itoito-raa i te oraraa i te evanelia i roto i te utuafare ». ¹² Ua riro te ohipa hiero e te aamu utuafare ei tuhaa no te oraraa i te evanelia i roto i te utuafare. E ti'a i te reira ia riro ei ohipa utuafare eiaha râ ei ohipa noa na te Ekalesia.

Ua haapuui-faahou-hia te ohipa no te aamu utuafare e no te hiero e te Peresideniraa Matamua e te Pûpû no te Tino Ahuru Ma Piti Aposetolo. ¹³ Ia rave ana'e outou i teie tuhaa ohipa e faarahihia ia to outou e to to outou utuafare i te oaoa e te popou.

Te tai'o nei tatou i roto i te Parau Haapiiraa e te mau Parau Fafau : « Ua fatata mai te mahana rahi o te Fatu... No reira ia pûpû atu tatou i te hoe ô i te Fatu mai te hoe ekalesia, te hoe feia, e mai te Feia Mo'a i te Mau Mahana Hopea Nei, i roto i te parau-ti'a ; e ia pûpû atu tatou i roto i to'na hiero mo'a... i te hoê buka tei roto i te reira te mau papaa parau no to tatou feia i pohe ra, o tia ia farii-taatoa-hia ra ». ¹⁴

E faaineinehia ia teie « buka » ma te faaohiparaa i te mau parau faa'ite



i roto i te tuhaa haamaramaramaraa a te Family Tree [Tumu Raau Utuafare] a te Ekalesia.

Te hi'o nei e te tuu nei au i te mau parau faa'ite i roto i teie tuhaa haamaramaramaraa no te mea te hinaaro nei au e ia vai te mau i'oa o te feia atoa ta'u e here nei i roto i te buka. Aita anei outou e hinaaro atoa ia na reira ?

Te parau ra te tufaa 128 o Te Parau Haapiiraa e te Mau Parau Fafau e, « no te mea ia ore ratou [to tatou mau tupuna] e ore roa e tia ia tatou ia haamaitai-roa-hia ia ore ratou ; e ore atoa hoi ratou e haamaitai-roa-hia ia ore tatou nei ». ¹⁵

Ua hau atu te aamu utuafare i te parau tuatapaparaa tupuna noa, te mau ture, te mau i'oa, te mau tai'o mahana, e te mau vahi. Ua hau atu i te hi'o-noa-raa i te mea i muri ia tatou. Tei roto atoa i te aamu utuafare i teie nei mahana ia papa'i tatou i to tatou iho aamu. Tei roto atoa to ananahi a papa'i ai tatou i te aamu no ananahi na roto i to tatou huaai. Ei hi'oraa, ia faa'ite ana'e te hoê metua vahine i te mau aamu e te mau hoho'a o to'na

utuafare i ta'na mau tamarii, te rave ra ia oia i te ohipa no te aamu utuafare.

Mai te amuraa i te oro'a, te haereraa i te mau pureraa, te tai'oraa i te mau papa'iraa mo'a, e to tatou iho mau pure, e ti'a ia ia riro te aamu utuafare e te ohipa hiero ei tuhaa tamau no ta tatou iho haamoriraa. Ua riro te pahonora a ta tatou feia apî e a vetahi ê no te mau aniraa manihini a te mau peropheta ei faaûruraa e ei haapapûraa e *e nehenehe e e ti'a* teie ohipa ia ravehia e te *taato'araa* o mau melo *noa'tu te faito* matahiti.

Mai ta Elder Quentin L. Cook i tatarara, « tei ia tatou ra [teie nei] te haapiiraa, te mau hiero e te mau mauhaa ». ¹⁶ E mea ohie a'e i teie nei te raveraa i te ohipa no te aamu utuafare e taoti'a-noa-hia te reira e te rahiraa melo o te faariro i te reira ei ohipa rû. Te titau noa ra â te ohipa i te taima e te faautu-siaraa, e nehenehe râ ta te mau taata *atoa* e rave i te reira, ma te ohie mau ia faaauhia i te mau matahiti i ma'iri.

No te tauturu i te mau melo, ua haaputupu te Ekalesia i te mau parau faa'ite e ua horo'a mai i te mau mauhaa

ia nehenehe te rahiraa o te ohipa ia ravehia i roto i to tatou iho mau fare aore râ i roto i te mau fare pureraa e te hiero. Ua tatarahia te rahiraa o te mau fifi. *Noa' tu* eaha to outou mana'o na mua' tu, e mea taaê ia i teie nei !

Tera râ, te vai nei te hoê fifi eita e nehenehe i te Ekalesia ia tatara. O te feaaraa ia o te taata tata' itahi ia rave i teie ohipa. Te mea noa e titauhia o te hoê ia faaotiraa e te tahi maa tautoo-raa. Eita te reira e titau i te hoê taime rahi. Na te tahi noa maa taime tamau e faatupu i te oaoa no ni'a i teie ohipa. A rave i te faaotiraa ia nuu i mua, ia haapii e ia ani i te tahi taata ê atu ia tauturu ia outou. E na reira ia ratou. E riro mai ia te mau i'oa ta outou e ite e afa'i atu i te hiero e mau parau faa'ite no te « buka ». ¹⁷

Noa' tu te rahiraa u'ana o te mau melo e rave nei i teie ohipa, te ite nei matou e mea iti roa te mau melo o te Ekalesia e imi e e rave tamau nei i te mau oro'a hiero no to ratou utuafare. ¹⁸ *E ti'a ia ia tauihia teie huru i roto i ta tatou mau ohipa rû.* Eiaha e aro i te tauraa, a farii e a pee râ ! Ua riro te tauraa ei tuhaa no te rave'a rahi no te oaoa.

E ti'a ia ravehia teie ohipa, eiaha noa no te maitai o te Ekalesia no to tatou ra feia tei pohe e no tatou iho. Titauhia ia tatou e to tatou mau tupuna tei pohe i te mau titiro i roto i to tatou buka ratere pae varua.

Te « natiraa » ¹⁹ i to tatou mau utuafare na roto i te mau u'i e tupu i roto ana'e i te mau hiero na roto i te mau oro'a taatiraa. E mea ohie te mau taahiraa : *a imi i te hoê i'oa e a afa'i atu i te hiero.* E nehenehe ia ia outou i muri mai ia tauturu i te tahi atu mau taata ia na reira atoa.

No te tahi rii noa tumu, e nehenehe—*te mau taata atoa*—e rave i te reira !

Te vai nei te mau haamaitairaa mau e apee nei i teie ohipa. E rave rahi mau metua e feia faatere e pe'ape'a nei i te mau huru oraraa o te ao nei i ni'a i te mau utuafare e te feia apî.

Ua fafau Elder David A. Bednar : « Te ani manihini nei au ia outou e te feia apî o te Ekalesia ia haapii mai e

ia ite i te Varua o Elia... E te fafau nei au e e paruruhia outou i mua i te faahemaraa onoono a te enemi. A amui mai ai outou i roto e a here ai outou i teie ohipa mo'a, e faahereherehia outou i roto i to outou apîraa e i roto i to outou oraraa ». ²⁰

Te mau taea'e e te mau tuahine, ua tae i te taime ia iriti ê atu i te mea e tape'a nei ia tatou e ia haere e rave i te ohipa. Eiaha tatou e haamau'a i to tatou faateiteiraa aore râ te faateiteiraa o to tatou utuafare no te mau mea faufaa ore.

E ohipa teie na te Atua, ia ravehia e te mau melo e te mau melo ore, te feia apî e te feia paari, te tane e te vahine.

E opani au na roto i te irava mata-mua o te himene 324 (reo Peretane) e e tau i au hoê parau :

« A ti'a e te [Feia Mo'a] na te Atua !

Ua oti te mau ohipa rii rii.

A horo'a i to aau e to varua e to mana'o e to puai

No te tavini i te Aarii o te mau Aarii ». ²¹

I te i'oa o Iesu Mesia, amene. ■

TE MAU NOTA

1. Hi'o 2 Nephi 2:22–25 ; 9:18 ; Mosia 2:41.
2. Hi'o Guide to the Scriptures, « Plan of Redemption » ; scriptures.lds.org.
3. Te mau Hiro'a Faaroo 1:3.
4. Hi'o Te Parau Haapiiraa e te Mau Parau Fafau 107:22.
5. Hi'o Te Parau Haapiiraa e te Mau Parau Fafau 107:23.
6. Hi'o Te Parau Haapiiraa e te Mau Parau Fafau 107:24.
7. Hi'o Te Parau Haapiiraa e te Mau Parau Fafau 107:25–26.

8. Hi'o Guide to the Scriptures, « First Presidency », « Apostle », « Seventy » ; scriptures.lds.org.
9. *Manuel 2: Administration de l'Église* (2010), 2.2.
10. Alama 42:8.
11. Boyd K. Packer, « Te ite », *Liahona*, Me 2014, 95.
12. Spencer W. Kimball, « Living the Gospel in the Home », *Ensign*, Me 1978, 101.
13. Hi'o Thomas S. Monson, « Haapeepi i te Ohipa », *Liahona*, Tiunu 2014, 4–5 ; Henry B. Eyring, « La promesse de tourner les coeurs », *Liahona*, Tiurai 2014, 4–5 ; Russell M. Nelson, « It All Starts with Love » (video), lds.org/prophets-and-apostles/unto-all-the-world/it-all-starts-with-love ; Russell M. Nelson, « Adding 'Family' to Family History Work » (video), lds.org/prophets-and-apostles/unto-all-the-world/adding-family-to-family-history-work ; Russell M. Nelson, « Des générations liées par l'amour », *Liahona*, Me 2010, 91–94 ; Richard G. Scott, « Te oaoa no te faaoraraa i tei pohe », *Liahona*, Novema 2012, 93–95 ; Quentin L. Cook, « Te mau a'a e te mau amaa », *Liahona*, Me 2014, 44–48 ; David A. Bednar, « E riro te aau o te mau tamarii i te farii mai », *Liahona*, Novema 2011, 24–27 ; Neil L. Andersen, « A Classroom of Faith, Hope, and Charity » (address to Church Educational System religious educators), lds.org/broadcasts ; Neil L. Andersen, « Find Our Cousins ! » (address at RootsTech Family History Conference, Fepuare 8, 2014), lds.org/prophets-and-apostles/unto-all-the-world/find-our-cousins.
14. Te Parau Haapiiraa e te Mau Parau Fafau 128:24.
15. Te Parau Haapiiraa e te Mau Parau Fafau 128:18.
16. Quentin L. Cook, *Liahona*, Me 2014, 47.
17. Te Parau Haapiiraa e te Mau Parau Fafau 128:24.
18. Hi'o Quentin L. Cook, *Liahona*, Me 2014, 47.
19. Te Parau Haapiiraa e te Mau Parau Fafau 128:18.
20. David A. Bednar, « E Riro te Aau o te mau Tamarii i te Farii mai », *Liahona*, Novema 2011, 26, 27.
21. « Rise Up, O Men of God », *Hymns*, no. 324.

